



**Lahore police-i Imran Khan
teyi Aleema Khan apu**

**Asian Games: Valarivan-i tetsür 10m Air
Rifle asaya nung silver angu**



Nagaland draft electoral roll nung tenüng 1.59 lakh agienogo

Kohima, September 20, 2026 (Agencies): Deobarnü Nagaland indang draft electoral roll sayaba nung voter lakh 1.59 shi jungnua agienba shia lir.

Deobarnü pre-SIR list sayaba nung Nagaland nung voters lakh 13.57 nungi lakh 1.59 shi agienba metetdaksüogo.

Iba draft roll nung tenüng lakh 11.99 lir aser Special Intensive Revision (SIR) exercise agidang taoba list nungi voters 29,944 asüba mesüra teti atema ki belenba bushitetogo aser voters 5,059 tashi tesem aika nung tenüng zülüoka alilba putet ta Chief Electoral Officer (CEO) office ajanga ashi.

Nagaland nung August 16 nungi September 14 tashi electoral rolls indang Special

Intensive Revision (SIR) agia liasü.

Electoral rolls nung absent/shifted/other telemsa nung adenba voters ya tanga states mesüra Union Territories nung voters akümba, kong lir manguba, September 14 tashi nung parnok forms magütsüba mesüra register asütsü memulungertem dena lir ta CEO office-isa metetdaksüogo.

October 20, 2026 tashi nung electoral list nungi tenüng agienba atema claims aser objections agütsütsü akok.

Iba sülen November 22, 2026 nü final electoral roll sayatsü aser November 18 tashi notice phase aser disposal of claims and objections alitsü ta CEO office-isa metetdaksüogo.

Theja Rio'er 'Angh' nem Platform Prize agütsü

Guwahati, September 20, 2026 (Agencies): Nagaland filmmaker Theja Rio-i 2026 Toronto International Film Festival (TIFF) nung Platform Prize nguogo.

September 20 nü TIFF nung iba sempet agütsü aser Platform jury-i Theja Rio indang film Angh tushia liasü.

Angh film ajanga 1960s Nagaland nung sobaliba aser maitsü melenshiba indang otsü ashir.

Taküm TIFF indang Platform programme atema film 12 shimtetba rongnung Angh ya ka liasü.

Iba Platform Prize atema takok marok ka aser CAD 20,000 senpet agütsür.

Iba takok ajanga Oscar eligibility rules tasenba nung Angh nem Academy Award for Best International Feature Film tetoktepba nung adentsü lenmang lapoktsür.

WSAONRC-i CM Rio dangi shidi zülü

Dimapur, September 20, 2026 (TYO): Western Sümi Area Oil & Natural Resources Committee (WSAONRC)-i agreements yimjak nung metetdaksütsü, revenue lemsatepba osang tejangja sangoktsütsü aser Naga nunger ali kibur temetentem kümzüka ayutsü ayongzükogo.

WSAONRC ya Western Sümi Hoho (WSH) kübok tentetba luden ka lir aser parnoki Chief Minister Neiphiu Rio dangi shidi zülüba nung item ya shia lir.

Sorkari oil exploration tenzükshitsü mapa pelashishia agizüker saka oil and gas exploration aser extraction atema Memoranda of Understanding (MoUs) ajak yimjak nung sayutsüla ta parnoki ashi.

Assam-Nagaland arrtsülen Disputed Area Belt (DAB) nung revenue-sharing inyakyim tejangja lemsateptsüla ta WSAONRC-isa shiogo.

2017 aser 2022 tsüngda Assam-i drilling points ti nungi Rs 9,903.63 crore state share lemezükogo. Nagaland sorkari state ana tsüngda revenue-sharing inyakyim mulungtepba

yimjak nung ashitsüla aser kasa mapang Nagaland-i tim tangutsü lemezük asü masü jangjatsütsüla ta parnokisa CM Rio dangi zülüba shidi nung shia lir.

Niuland aser Ganeshnagar nung oil refinery and gas processing plant amenoktsüla kechiyong local processing ajanga mapa adoktsü aser rongsenketzüng renloktsü ta parnokisa metetdaksüogo.

WSAONRC-isa sorkar dang exploration aser extraction maparen ajak Arlla 371A den putepa inyaksüla aser talisa Naga nunger alia ser ali rongsen madak kibur aser temetentem den putepa latettsüla ta metetdaksüogo.

"Asen ali rongsen ya asen nübortem tarutsü aser taküm libaliro atema lir. Terenlok bener aruba nung ashishitep malitsüla, local infrastructure alitsüla aser temzüngi melaba temetentem kümzüka ayutsüla" ta WSAONRC-isa ashi.

Nagaland ali rongsen ketdangsüba nung sorkar ased sendaktepa alirtem den külemi yaritepa inyaksü mulunga lir ta WSAONRC-isa ashi.

Naga yimtenren mapa ya Nagaland nung dang tenzük: Dr SC Jamir

Dimapur, September 20, 2026 (TYO): Nagaland nung alirtemi dang Naga yimten latettsü temeten lir kechiyong Naga yimtenren mapa ya Nagaland nung dang tenzük ta taoba Nagaland chief minister aser governor Dr S.C. Jamir-i ashi.

"1929 nung Simon Commission nem memorandum agütsübai Nagaland nung alirtem dang inyakba liasü. Wokha nung Naga National Council (NNC) tentet. World War II sülen British yimsüsüba kübok alirtemi nüjiso bushiba mapa tenzük dang Nagaland nung aliba Naga nungeri dang Naga lima balaka lia aotsü asoshi mapa tenzük liasü aser A Z Phizo lenisüba kübok 1951 plebiscite alidanga taoba mapang Naga Hills ta ajaba Nagaland nung aliba Naga nungeri dang shilem agi" ta Dr. SC Jamir-i metetdaksüogo.

"Item maparen balala nung Nagaland adena orr aliba Naga kin shingaia shilem magi aser Nagaland ali nung dang tenzük aser tain aküm. Ajisüaka tia maka tangari iba movement nung teka ia inyaker saka Naga yimten latettsüba ya Nagaland nung alir nem dang yujangma" ta paisa ashi.

NNC ya telungpur telok ka masü saka Nagaland nung alirtem

indang yimtenren reju ka liasü. Ajisüaka, tanübo NNC nungi telok balala razüka telok 37 jungnua kümogo ta Dr SC Jamir-isa ashi.

1946 aser 1954 tsüngda Nagaland nung alirtemi NNC sülen noktak aser 1955 tejaklen tashi prangpong amer raradang Naga tesem ajungalen ozüng alema inyaksangshi aser azütoskhiba liasü. Ajisüaka iba mapang southern Naga nungeri aria mebilemtsü ta paisa metetdaksü.

1957 küm Naga Peoples Convention tentetba ya tongtipang alizüng ka liasü aser Nagaland Baptist Association-i meranga inyakba ajanga Wokha nung ceasefire tenangzüktep agia liasü. Ajisüaka NSCN (IM)-i India sorkar den tang ceasefire agia aliba yabo parnok sasa mulungteta agiba asütsü ama bilemer kechiyong parnoki sorkar den asüngdangya masü ta Dr SC Jamir-isa metetdaksü.

"NPF-i telungpur teloktemi jembia aruba kasa olen jembir aser Naga politics ajunga ya ni P Shilu Ao dangi zülüba shidi nung dak sendaka lir ama parnoki jembir. Tang ya tejen otsü mesüra nüngdakba maliba onük kaktettsü mapang masü" ta paisa ashi.

August 3, 2015 nü Prime

Minister, Home Minister aser National Security Advisor lia Framework Agreement nung sign sütep aser iba nung 'sovereignty mesüra integration' shia mali, aser iba ajanga Framework Agreement ji Constitution of India sasep nung agiba lir ta sayur.

Prime Minister shingaia Constitution nungi pilar political agreement kecha magitsü aser kasa linük ka nung sovereignties ana kodanga memelatsü ta Dr SC Jamir-isa ashi.

Metokmeperi kar adokra Parliament dangi aotsü aser Arlla 371A ama bendenloktsüsa akümtsü, külen Manipur aser Arunachal Pradesh nung Naga tesemtem tashi atema Sixth Schedule kübok bendenloktsü ta paisa nenshia ashi.

NNPGs-ibo tesüiba nung parnok Agreed Position yimjak nung prokshiogo saka NSCN (IM)-ibo Framework Agreement miim kulikaket ka ama dang mesayui ayur ta paisa ashi.

Nagaland nung alirtemi yimjung arutsü aser tensa süngjemtsü atema yongyaseta atar anungji NSCN (IM) aser NPF lenisübai Framework Agreement ya mapa kuma inyaksü mepishir ta Dr SC Jamir-isa ashi.

Nepal nung nisung 6,000 samaba maneni bushir



New Delhi, September 20, 2026 (Agencies): Nepal nung lendong tulu ataloker hopta pezü jungogo saka tang tashi nisung 6,000 atema search operations inyakdar aser tasür 1,450 adenogo.

Nepal-Tibet arrtsü anasa tzümetsüng lendong tulu atalokdang ki aika samatsüogo aser jila o yimtsüng jenti nung teraksa bentsür arua lir.

Bhotekoshi River nung tzümetsüng tulu adokba ajanga minute ishika tsüngda nisungtem, parnok ki, garitem, lenmang aser aputem ponger ao.

August 26 ajungben

tzümetsüng nung nisung 1,451 süogo aser rescuers-i tasü mangtem maneni bushiteta arudar ta Nepal Police-i metetdaksü.

Tasü mang teimtiba ngutetbaji Chitwan district nung lir aser iba tesem nung tasü mang 367 ngutetogo. Maneni, Rasuwa nung tasü mang 236, Nawalparasi East nung 232 aser Nawalparasi West nung 222 ngutetogo ta police-isa ashi.

Nuwakot nunga tasü mang 203, Gorkha nung 79, Dhading nung 72 aser Tanahu nung 38 nung angu. Kathmandu hospital


ka nung nisung ana anepaludang asü.

Nepal nung nisung 6,000 tashi samar bushitepdar aser search operations teinyakdak lir.

Nepala nung hydropower project tunnel tem merüktettsü atema ita asem mesüra pezü tashi agitsü akok ta Nepal Army field commander kati ashi.

Tang tashi nung tasü mang 1,300 jungnua DNA samples bendenba sülen ali nung rememogo. Tasü mang 110 dang jangjatetba sülen pei pei kinunger ket nung agütsüogo ta ketdangsürtemi ashi.

Ghaspani-I aser Ghaspani-II ACs atema Draft E-rolls adoktsüogo



Dimapur, Rongjui/Sept. 20 (TYO): Photo Electoral Rolls, 2026 indang Special Intensive Revision (SIR) dak sendakba nung Chümoukedima district kübok 4-Ghaspani-I aser 5-Ghaspani-II Assembly Constituencies atema Draft Electoral Rolls tem September 20, 2026 nü adoktsüogo.

Office of the Deputy Commissioner and District Election Officer, Chümoukedima ajanga sangdong ka nung ashiba agi, draft electoral rolls ya October 1, 2026 ya qualifying date ama renem aser office mapang Electoral Registration Officers (EROs) indang offices aser polling stations nung angutsü

angutsü.

Chief Electoral Officer, Nagaland-ia electoral roll exercise kübok awajemba constituencies tem rongnung Ghaspani-I aser Ghaspani-II dena lir.

Electors temi Draft Electoral Roll nung tenüng inoktsü, melenshitsü mesüra tanga particular melenshitsü lira October 20, 2026 tashinung agütsütsü akok, ta ashi.

4-Ghaspani-I Assembly Constituency atema sangdong ya T. Lemlila Sangtam, NCS, Electoral Registration Officer ajanga agütsü aser 5-Ghaspani-II sangdong ya P. James Swu, NCS, Electoral Registration Officer ajanga agüja liasü.

Ashishitsü alibatem Form 6, Form 7 aser Form 8 nung agütsütsü. District tesem ajunga nung agütsü aliba SIR asoshi iba temelenshi agütsütsü mapang ya September 20 nungi October 20, 2026 tashi alitsü.

Ashishitsü aser temotongshitsü alibatem list ya Chief Electoral Officer, Nagaland indang website nung angutsü aser ERO offices indang notice boards nunga yutsütsü.

Temsüa aliba nübur ajunga electoral roll nung inoka electoral rolls shidak ayutsü atema iba Special Intensive Revision ya agir. State indang final electoral roll ya November 2026 nung adoktsütsü.

Wokha aser Kohima indang draft rolls adoktsüogo

Dimapur, Rongjui/Sept. 20 (TYO): Kohima aser Wokha districts nung Assembly constituencies indang draft electoral rolls Deobarnü adoktsüogo, koba Photo Electoral Rolls, 2026 indang Special Intensive Revision (SIR) nung shilem ka lir aser October 1, 2026 ya qualifying date asütsü.

Wokha district kübok Assembly constituency pezü nungi enumeration exercise mapang electors 6,547 delete asüba sülen elector electors 1,02,271 record süa liasü, ta sangdong ajanga ashi.

Revision masüidang 37th

Tyui, 38th Wokha, 39th Sanis aser 40th Bhandari constituencies meyokteper electors 1,08,818 liasü.

August 16 nungi September 14 tashi enumeration asüba mapang Enumeration Forms 1,02,271 meshia digitise asü.

Deletion 6,547 aliba nungya asür 1,928, mejangjaba mesüra absent electors 928, tesem melenshiba electors 3,333, duplicate entries 273 aser tanga categories kübok 85 liasü.

Draft roll yanglushiba nungya Tyui nung electors 24,840, Wokha nung 28,252, Sanis nung 23,426 aser Bhandari nung 25,753 lir.

37th Tyui AC kübok Koio II aser Tsingiki IV aser 40th Bhandari AC kübok Yimpang II nung polling stations tasen asem yanglu.

Kohima district nunga 8th Western Angami, 9th Kohima Town, 10th Northern Angami-I, 11th Northern Angami-II, 14th Southern Angami-I aser 15th Southern Angami-II Assembly constituencies atema draft rolls adoktsüogo.

Item rolls ya Electoral Registration Officer (ERO) offices nung angutsü aser Booth Level Officers ket nunga lir.

Assam Rifles-i Tsiepama yimtsüng nung medical camp ayongzüük



Dimapur, Rongjui/Sept. 20 (TYO): Assam Rifles temi meta talang nung alirtem nem healthcare service agütsüba maparen maneni September 20, 2026 nü Tsiepama yimtsüng nung medical camp ka ayongzüka liasü.

Yangji aliba nüburtem nem medical teyari agütsütsü, jenbutsü akokba tashidak, mürekmeju aser temang nunga alitsü yimyatem indang awareness agütsütsü nükjidong nung iba sentong ya ayongzüka liasü.

Iba medical camp nung tanur 18, tetsür 53 aser tebur 51nem

teyari agüja liasü. Iba mapang nüburtem temang repranga angadi medical consultation, mozü aser health advice agüja liasü.

Kasa mapang medical team-i yimdaklir tem den sensaksema temang junga aliba dak sendakba tebilemtsü lemsatapa mapang shidak nung temang anepalutsü asoshi lenmangtem sayua liasü.

Assam Rifles temi temang aser temeket mürekmeju, chiyongtsü, first aid aser jenbutsü akokba timtem indang awareness agüja liasü.

Iba session nung pei jurila aser lokti anema alitsü asoshi mera tongmelang aser mapa kuma inyakba, kasa tashidak nungi jenbua alitsü aser takum yimya tajungba amshitsü indang lemsatapa liasü.

Mürekmeju alitsü, chiyongtsü tajung achitsü aser nüngdakba mapang temang tendanga anepalutsü asoshi parnoki jembia liasü.

Assam Rifles temi ano maneni meta talang nung aliba nüburtem asoshi lenmang balala nungi yariteptsü temulungtetba lir ta ashi.

DC Tuensang-i Two-wheeler Taxi Permit atema metetdaksür

Dimapur, Rongjui/Sept. 20 (TYO): Deputy Commissioner and Chairman Regional Transport Authority Tuensang, Lithrongla Tongpi Rutsa-i temsüa aliba candidates nem Two-wheeler Taxi Permit agütsütsü indang metetdaksüogo.

Tuensang district nung lisopur mapa mongui alirtem nem pei sasa inyaker chiyonga-jema lidaktsütsü nükjidong nung Two-wheeler Taxi Permit ya agütsür.

Applicant ya Tuensang District indang lisopur asütsüla aser form agütsüba anogo tatem tashinung arishi küm 20 nungi 40 tsüngta asütsüla aser Driving Licence tejangja alitsüla.

Application form ta Office of Deputy Commissioner Tuensang nungi sen 100 agütsür

September 18, 2026 nü nungi meshitettsü. Application ya October 1, 2026 tashinung agütsütsüla aser application shidak malirtem magizütsü.

Form den Tuensang District indang Indigenous Inhabitants certificate/ Permanent Resident Certificate, Driving License, District Employment Officer ajanga agütsüba Unemployment Certificate, sorkari agütsüba Identify Proof-Aadhaar Card/ Voters ID/ PAN Card dener agütsütsüla.

Riding/ Driving atema shimtetba candidates tenüngtem Office of the Deputy Commissioner Tuensang aser District Transport Office Tuensang indang notice board nung October 6, 2026 nü agütsütsü, ta sangdong ajanga ashi.

NU Kohima Campus nung Freshers' Meet agiogo



Dimapur, Rongjui/Sept. 20 (TYO): Nagaland University Students' Union, Kohima Campus pur 33 buba Freshers' Meet 2026 sentong AGOK Badze, Meriema nung September 18, 2026 nü agia liasü. Iba sentong nung Deputy Commissioner Kohima, B. Henok Buchem, NCS o jembir liasü.

"KAIIROS - The Perfect Moment Begins Now" omen nung ajemdaker ayongzüka sentong nungya kaketshir batch tasen pela agizüka parnok university nung azüng tenzüka temaitsü ka ama liasü.

Buchem-i sentong nung jembidang, kaketshir tasentem dang tensa tetemjen matai maongka agitsü ayongzüka liasü.

Pa azüngba mapang nungi nübur tenzüka wadang tashi ajangshiba tem lemsatapa mapang, lulaa maotsü, renemtsü, tamang akatsü aser tamakok koktettsü ajungmesoa liasü.

Pai NPSC tatidang aiben agütsür tesüsa takok anguba indang lemsatapa liasü.

Buchem-i o intepba, kenshi oshi sentong, tetoktepba aser tanga sapang nung tokteptsü ayongzüka liasü.

Pai kaketshirtem dang technology aser artificial intelligence kanga kumdanga amshitsü ayongzüük aser temesepba mozü achiba, gambling asayaba, social media tali amshiba mesüra osang meshidak prokshiba nungi pila alitsü ayongzüka liasü.

Shisaluyim ya degree ka anguba kisüng masü, ta pai ashi aser kaketshirtem dang Nagaland University tenüng tajung wazüka ayutsü ajungmesoa liasü.

Pai senior students aser Students' Union dang kaketshir tasentem dang temeim sayua len anitsü ayongzüka liasü.

Sentong tenzüka Meshao Shiu-i sarasadem, NUSU-KC tir Putusunep Jamir-i pela agizüka o jembia.

Information and Publicity Secretary Loviboli Aye ajanga presentation ka agütsü, Department of English ajanga ken ka aten, freshers tenüng nung Department of Psychology nungi Kivini S. Zhimomi-i jembia.

Dr Pucho Kiso-i kaketshir asoshi temoatsü meshia sarasademtsü, General Secretary Jomithung Ngullie ajanga melepzüng o jembia aser Minuka Pradhan-i sentong tembanga sarasadem.



September 20, 2026 nü Jodhpur nung Indian Air Force (IAF) aser Japan Air Self-Defence Force (JASDF) na Exercise Veer Guardian-2026 agidang tangokba noksa nung anugr. Noksa nung Chief of the Air Staff (CAS) Air Chief Marshal AP Singh, Japan Air Self-Defense Force (JASDF) Chief of Staff General Takehiro Morita aser tangartem angur.

UP nung Ambedkar kürakyanglu 151 raksatsüogo: Akhilesh Yadav

Lucknow, Rongjui/ September 20 (Agencies): Amongnü Samajwadi Party tongti, Akhilesh Yadav-i, Uttar Pradesh nung BJP yimsüsüba mapang nung district 72 nung Babasaheb Bhimrao Ambedkar indang kürakyanglu 151 raksatsüogo, ajisüaka tang tashi nung item tatalokba 14 atema dang aibelenertem apu, ta metetdaksü.

Taoba mapang Uttar Pradesh Chief Minister-isa, BJP-i linük temzüng melenshinüba ajanga Ambedkar kürakyanglu raksatsür, ta aitsü.

Lucknow nung aliba SP office nung osangbenertem den jembidang Yadav-i, "Babasaheb Bhimrao Ambedkar indang kürakyanglu teimba raksatsü. BJP sorkar kübok district 72 nung (Ambedkar kürakyanglu) 151 raksatsüogo," ta

metetdaksü. Samajwadi Party-i item ama tatalokba 151 jangjaogo, ta pai ashi.

"Onoki ajak senteper tatalokba 151 jangjaogo. Ibaji küm sasep nung lemtsüra iba sorkar kübok küm shia kürakyanglu 15 raksatsüba den kasa lir. Iba dak alia item ama tatalokba ano aika alitsüa akok," ta pai metetdaksü.

Sorkar osang nung ajemdaker Yadav-i, item ken o 14 dak sendakba nung dang aibelenertem puogo aser tatalokba 45 atemabo mejangjaba nisungtem anema ken o benok, tatalokba ti atema FIR benok aser tatalokba 84 atemabo kecha meinyak, ta metetdaksü.

BJP sorkari Ambedkar, pa indang kürakyanglutem aser par nüburtem akhümmetsübur, ta paisa metetdaksü.

Tesülen Samajwadi Party-i district sasep nung Ambedkar kürakyanglu raksatsüba osang X ajanga metetdaksü.

SP-i X ajanga, Ballia nung Ambedkar kürakyanglu 9 raksatsü; Azamgarh nung trok, Mathura nung pongu, Muzaffarnagar nung pongu aser Saharanpur nunga pongu, Ghazipur nung pezü, Gautam Buddh Nagar nung pezü, Prayagraj nung pezü, Lucknow nung pezü, Varanasi nunga pezü aser Gorakhpur nung kürakyanglu ana raksatsü.

SP-i, item ama tatalokba shilem 85 atemabo police-i kecha meinyak, ta metetdaksü.

Yogi Adityanath-i aniba sorkar mezüngbuba kümsük mapang nung Ambedkar kürakyanglu 46 raksatsü aser tanabuba kümsük (term) nung 105 raksatsü, ta SP-i metetdaksü.

BJP-RSS-i shisaliok inyakyim nung ochimashi adokdaksür: Cong

New Delhi, September 20 (Agencies): Amongnü Congress-i, BJP-RSS-i linük nung shisaliok inyakyim nung ochimashi adokdaksüogo, ta tai tonglochtsü.

Lok Sabha nung Opposition lenir, Rahul Gandhi-i, shisaliok inyakyim majungba ajanga linük raksatsüogo aser kaketshirtem nem tasüngdangbatem-a masüngdangdaksüner, ta metetdaksü.

Honibarnü Indore yimti nung Congress lenir Rahul Gandhi indang lanurtem outreach programme 'Chhatron Ki Goonj' agiba mapang nung pai 'inyakyim vrs kaketshirtem' onük jembia liasü aser shisaliok,

mapa nung shimokba aser mapa manguba tebilemtsü onüktem nung Gen Z aser lanurtem den shisa lemsatepa liasü.

Iba sentong agiba dak sendakba nung Rahul indang 'post' ka lemsatepa Congress general secretary in-charge communications Jairam Ramesh-i, "Yashi Rahul Gandhi-i iba inyakyim miim mapatem jungkai adoktsüogo, koba ajanga kaketshirtem nokdang. Iba ya shirnok ajanga? BJP-RSS nisungtemi linük ajak azüokogo. Shisaliok, rongsenkettzüng, yimtenren aser reju ajak azüokogo," ta metetdaksü.

Ramesh-i X ajanga,

"Parnoki shisaliok inyakyim nung ochimashi adokdaksüogo, kechiyong iba inyakyim ajanga kaketshirtem tsübur. Parnoki (kaketsirtem) tasüngdangbatem asüngdang aser ochi akhanger," ta metetdaksü.

"Tang Rahul parnok den nokdaka lir, anungji kaketshirtem rongnung tetsübu anenogo. Linük tesem ajaklen parnok ola metangoktsür," ta Ramesh-i metetdaksü.

Ujjain nung RSS tongti, Mohan Bhagwat-i 'Yuva Dharma Sansad' sentong nung G Z pur 1,700 den jembiba sülen anogo ka lir Rahul-i Indore nung lanurtem den jembia liasü.



September 20, 2026 nü Visakhapatnam nung 13buba Sri Lanka-India bilateral maritime exercise, SLINEX-26 nung shilem agir Navy tem tangokba noksa nung angur.

India-i 2030 küm tashi nungbo 350 kmph bullet train yanglutsü

New Delhi, Rongjui/ September 20 (Agencies): 2030 küm tashi nungbo India-i ghonda ka nung kilometer 350 tashi kera senzütetba high-speed bullet train yanglutsü, aser ibaji Japan nunger next-generation E10 series trains den kasa asütsü, ta Railway Ministry-i metetdakja Mumbai-Ahmedabad High-Speed Rail (MAHSR) project benoka liasü.

Union Cabinet-i iba project (revised cost) ji agizükogo aser iba project nung sen 2 lakh crore indoktsü. Ibaji 2015 küm mezüng renemba project den anasü agi sen teimba lir.

Railway ministry-i Cabinet dang, 2024 küm December ita nung Japan-i tang aliba E5 series trains yangluba anener ta metetdaksüba sülen ministry-i B35 trains yanglutsü atema maparen tenzükogo, ta metetdaksü.

Japan-i E10 trains ji 2030 küm nungi tenzüka yanglutsü aser 2034 küm nungibo amshitetsüsa renema alitsü ta metetdaksüogo.

Railway ministry-i, India

nung B28 high-speed trains yanglu tenzükogo aser India-isa Bharat Train Control System (BTCS) yanglutsü ta metetdaksü.

Ministry-i, tamalen iba project atema sen 1.1 lakh crore lemsükja liasü ajisüaka tang sen teimba lemsükjang ta benokbaji talisa ali alizükba nung asemsü agi sen teimba-19,700 crore shi indoktsü aliba agi lir, ta metetdaksü.

Tamasa Mumbai-Ahmedabad corridor nung B28 trains senzütsü aser train ji ghonda nung kilometer 280 tashi kera senzütsü. B28 train 32 yanglutsü atema BEML-i contract agizükogo.

2027 küm mezüngbuba ita asem tsüngda tendangtsü atema prototype train anabo renema alitsü. Hokolbarnü BEML-i BSE dang, B28 train 15 tali yanglusemsü atema sen crore 5,400 contract agizükogo, ta metetdaksü.

Kilometer 508 Mumbai-Ahmedabad High-Speed Rail corridor ya 2030 küm December ita tashi nung renemtsü nükjidong lir.

Bihar Legislative Council menden 5 atema JSP-i candidates sangdong

Patna, September 20 (Agencies): Amongnü Bihar teachers' constituency nungi yimtiba, Patna nung Jan Suraj Party (JSP) tentetsang, Prashant Kishor-i Bihar Legislative Council constituencies menden pongu atema party candidates sangdongogo.

Kobi melii constituency 8 nung election agitsü.

Osangbenertem senden ka nung Kishor-i candidates pongu tenüng sangdong. Parnok rongnung Afaq Ahmed densema lir. Pai maneni Saran teachers' constituency nungi tokteptsü. Küm trok tejaklen pai Kishore teyari ajanga iba menden nungi takok ngua liasü. Iba mapang nungjibo JSP ya metenteti liasü.

Lawyer aser shisashir Divya Jyoti-i taoba hopta nung

ang JSP nung aden; lai Patna teachers' constituency nungi tokteptsü. Tang iba menden nung JD(U) otongdar, Neeraj Kumar lir.

JSP-i Darbhanga teachers' constituency atema JSP-i SP Rai shim; Ravindra Yadav-i Darbhanga graduates' menden nung tokteptsü aser Rajnish Ranjan-i Kosi graduates' constituency nung tokteptsü.

District 30 nung graduates' constituency pezü aser teachers' constituency pezü nung election agitsü atema kobi melii sangdong agütsütsü.

Tamalen JSP-i parnoki menden 8 prongla nung tokteptsü ta sangdonga liasü, ajisüaka Amongnü parnoki menden pongu atema dang candidates sangdong.



STATE BANK OF INDIA

ONOK INDANG CUSTOMER TEM DANG SANGDONGER

Unions/associations tenet- AIBEA, AIBOC, NCBE, AIBOA, BEFI, INBEF & INBOC tenüng nung United Forum of Bank Unions (UFBU)-i temalen shia aliba unions/associations tenet nung züngsemtem dang item anogotem- September 28, 29 aser 30, 2026 anogotem nung linük tesem ajaklen bank longkak aitba nung shilem agitsü metetdaksüogo.

September 28, 29 aser 30, 2026

2. Bank ketdangsertemi Branches/Offices nung services terabo agütsütsü merangdar, ajisüaka yamaji ka mesütet nungbo onok indang customer temi timtem ajangshitsüa akok.

3. Anungji onoki onok indang customer ajak dang longkak aitba anogo metenzükdang banking transactions asütsü mepishir, ibaji ajanga Branches/Offices shibang nunga parnok timtem majangshitsü. Onok indang customer tem dang longkak aitba anogo (tem) nung pei nüngdak atema ATMs amshitsü mepishir. Iba dak alia banking transactions atema online banking facility, YONO aser tanga digital modes amshitsü mepishir.

4. Longkak aitba ajanga customer temi timtem ajangshitsüa akok, anungji onoki lephsia iba atemaji sasaba lemsateper.

Sd/- State Level Banker's Committee
State Bank of India, Local Head Office



TIR YIMYIM YIMOBILEM (EDITORIAL)

DIMAPUR MONDAY, SEPTEMBER (RONGJUI) 21, 2026

Mapa angazükdak akatsüla

Joko, India nunga putu den apet kaketreju nung sayubaren "Education Policy" tasen lateta aotsü tenzüko. Iba kaketshisatsü sayuyim tasenba nung tali temulung agüja sayutsü latetja alibaji, pei tetsü oshi angazükdaktsütsü aser tazünger shia pei azüngba 'course' atemdang pa mesüra la teka agi tagitsü langkabo inyak aser yanglutsü ashitsüsa sayutsü latetja lir. Ibai linük nung kaketreju ajak nung sayutsüba sayuyim tasen asünungji, kaketrejutem ajak nungbo shitak tenzüka mouteter, kechiyong sayuyim tasenba nung aliba sentongtemji mapa küma inyaksü asoshi kiojena talila nüngdaker aser mapa shia tesayurtema nüngdaker. Item nüngdak ajakji benoka shisalemsateptsü atema Chümoukedima district nung Northeast state-tem nungi yimsüsür aser tesayur mongintem jaoka shisalemsatepba sentong ka yashi yakanü agia tembangogo. Iba sentong nunga Northeast nung kaketshirtem nem akhi ama 'academic degree' agütsüba dang masü saka pei teka agi mapa kabosa inyak ashitsüsa sayutsü atema nüngdakba kiojen, lenmang aser electric light agütsütsü aser ano mapa inyakdak tesem balala nung kaketshirtem mapa angazüki yoktsüsa tesendaktep yanglutsü nüngdakba indang jembiogo. Item ajakji Northeast nungsa süaka, tanga state-tem nungbo inyaktetsü aser inyakdagi saka Nagaland nungbo tang tashi timtem tulu lir, kechiyong asen lima nung mapa angazüksüsa mapa inyakdak industry mesüra technical institution peria mali. Tanü kaketrejutem nung mazüngertemibo nüngdakji mangatetsüa akok, saka asenoki angatetsüba kaji, akhidang technical masü saka general Arts, Science aser Commerce azüngertem asoshi degree ngua azüngtsüba dang liasü, anungji kaketshirtem asoshi mark tajung ngua degree angutsüba dak alaka teka agi inyaksüsa mapa mesayu, anungji mapa inyakbo kecha mashi memetet ser graduate asü. Tanü iba jagi tazünger ajak government mapa bushir, kechiyong government mapa meinyakra, tanga mapa inyak kecha mesayu, mangazük aser mashi. Iba kasa kuli jagi tanü government mapa mangurtem kangshidagi. Tanübo Education Policy tasenbai Arts, Science aser Commerce azüngertem ajak peisasa inyaksüsa mapa kabo angazüker külenang graduate asütsü telatetba agüja lir, anungji college azünger kaketshir shiai mapa inyakdak farm, factory, industry mesüra shishilembadak ka nungbosa oagi mapa angazüka anogo ishikabo inyaksü nüngdaker. Iba mapang dangji internship ta ajar. Iba mapa angazükba mapangji temer mapa kiburi mapa inyak angazükba kuli kaket agütsütsü. Tanü asen lima nung tebilemtsü tulutibaji lanurtemi mapa inyak mangazüknüba aser mapa meinyaknüba tebilemtsü masü saka mapa inyak angazükdak makaba tebilemtsü lir. Aji oda, asenoki tang asen akaba college-tem ya toktsür, tanga state nung ama, IIT lapoktsü indang jembir, ajisüaka tang Arts azüngertema dena mapa angazükdak 'internship' agidak dena maka nung, IIT nung azüngetemjibo tanga state nung oagi internship agitsüla adoktsü. Atangji, asen lima nung NIT, ITI aser tanga mapa sayudak reju karbo lir, saka item nungji azüngertema 'internship' kongang agia alitsü ta bilemer. Atangji, kaketshir ka dak tejangraba dang lira, odanga tesem mashi ka bushia oagi agitettsü, ajisüaka ajak kasa masü, kari mejangrar aser karbo jangrayonga tangaleni mouteter. Ibai asangsang nung asenok tia jenjang lir, anungji state government-i iba tebilemtsü aser nüngdak ya reprangteta, lanurtem tagidak maka küma moudaktsüi mapa inyak angazüksüsa arsangokja inyaksüla.

OLEMSABANG

ELECTION MERUKA MAGITET TASHI ASEN LIMA MEYANGLUSHITSÜ

~ L. Kika Pongener

Asen Naga lima nung sorkar ketdangsuba inyakyim, terenlok mapa inyakba, jila aser yimtsüngtem nung yimsüsuba aser inyakyim reprangdanga ora; teimba ka nuburi temulung masütsüsa inyakba angur. Iba ya kodaser yanglushitsü (?)...ta nubur aikati kanga khuret sua bilemer. Yongji, Tir Yimyim osangkaket yimobilem aser olemsabang nunga; lennir aikati mapang shia pei tebilemba lemsatepa ocet züluba temulung kanga chia azünger. Atangji, tanü asen Naga lima sorkar nungi tenzüker; jila aser yimtsüng nung yimsüsuba aser loktiliba inyakyim ajak jungjunga reprangdanga; teimba ka teraksa aser ochimashi agi sunga lir. Iba teraksa aser ochimashi mapatem ya kong nungi adoker (?)...ta teraji bushidanga; tanga kecha agi masü; saka sen meimba aser rongsen penbuba nungi tuluba adoker. Ano aji dang masü, Naga lima jila/yimtsüng aika nung Election agiba shia tashiyim mapa tamajung inyakteper; ochimashi mapa tapu-tapu inyakteper aser nubur tsüngda telemsa adoker aser yimtsüng karbo Election ajanga yimden nunga telemsa adoker. Anungji iba ya kodaser yanglushitsü (?)...ta teraji kanga junga bushidanga; Election meruk-meruka agitetnungdang asen lima teraksa ya yanglutshitetsü ta nubur ajaki rajema angateter.

Aji oda, Election meruk-meruka magitet tashi asen lima nung loktiliba ajak raksadaktsüba aser menendaktsüba lokti temenen (Social Evils) ya kodanga masüngtettsü. Anungji asen Naga lima teraksa ya yanglushidi ta bilemra....Mulungtet telok (NGO) aser asen lima meimer senso tajung lennir ajaki nungsen metsübui; ochimashi mapatem anema, tasü-ita yimjak nung yabo tim masü, yabo majung, yabo melenshitsüla ta ola adoktsüla. Talisa, arogotem, mungdang aser NBCC-i ochimashi mapa aser ochimashi inyaker yimsüsür aser lokti lennir anema tasü-ita ola adoktsüla. Tanü asen lima nung ochi jembir, ochimashi anema ola adokerbo aikati sempar....Ajisuaka, asen lima yanglushitsü asoshi nungsen arema ola adoker karbo alitsüla. asen lima nung Election meruk-meruka agitsü atema jila aser yimtsüngtem nung yimsüsürtem dak meimlatsüla; kechiyung manganutsü mali; jila aser yimtsüngtem nung yimsüsürtem teimba ka Election mapa nung teka menenogo.

Asen lima raksa-a aliba aser ochimashi mapatem agi sunga aliba ya yanglushidi ta bilemra; ochimashir sorkar ketdangser anema, ochimashir yimsüsür anema, ochimashir lokti lennirtem anema; arogo aser mungdang lennirtemi nungsen metsübui tasü-ita ola adoktsüla. Küm ishika tejaklen NBCC aser ABAM-i anir asen lima teraksa ya yanglushitsü atema 'Clean Election Campaign' yimyim ayima tenzüker kanga merangdanga inyakba ajangshia aruogo. Ano Aor Ordain Minister-temi anir Tsüngrem lartem, laishirtem aser kaketshirtem aikati bendanga agüja inyakba ajangshia aruogo. Ajisuaka, bilemba ama takok ngua meinyakteti tanü tashi tamakok nung lir amai reprangteter. Kanga tesasatsü-ka, lim arogotem nung sannuker aser toklang tenzüker karibo arogo-i Politics nung teka amuoka shilem magitsüla ta nungsen maginuba agi anemsu o jemibiba; aser karibo aibelena angatetba agi iba mapa nung kenbang-opang ka ser; Tsüngrem lartem aser arogo nung toklang tenzüker ajaki mulungsoa shilem magiba ajanga; iba mapa ya bilemba amai takok monguteta ta nubur aikati kanga nemjema bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China nung Early Rain Covenant Arogo nung lenirtem apu



China nung Police-i Early Rain Covenant Arogo nungi lenirtem puer aoba mapang tangokba noksa nung angur.

September 20, 2026: September 10, 2026 nü China nung Early Rain Covenant Arogo nung lenirtem miimshia teahouse ka nung adenshia Arogo dak sendakba onüktem nungo lemtepba mapang ketdangsertem arua parnok puer ao.

Arogo nung lenirtem senden tagidak mapang nung nikongdang 3:00 ako meta police aruba sülen lenir 11 puer ao.

Tesüiba küm 10 tashi China nung communist ketdangsertemi Early Rain Covenant Arogo amokmerener, mita repranger aser lenirtem apur.

Chinese Communist Party (CCP) ketdangsertemi Arogo nung lenirtem puer aoba sülen Arogo nung züngsemtem

shisabulu tenzüokogo.

Arogo nung lenirtemji teimbaka arrshi küm 70 ser temapurtem lir. Parnok rongnung arrshi küm 73, He Futao bo temelungjang tashidak agi timtemer. Tawa pa surgery agia cancer mesen tema aliba tepokpok kabo agienogo aser maneni medical treatment nüngdaker.

Parnok police station-i puer aoba sülen Arogo nung züngsemtem aser kinüngertem police station kima adenshia ghonda aika liasü.

Police-i parnok dang ghonda 24 tsüngda ken o ajak bentettsü ta ashi. Tasügnü ayaterm mapang nung ambulance ka aru. Ambulance ji kechi atema aruar memetet, ajisüaka Arogo nung lenirtem rongnung kar

temang kanga mejungi emergency medical teyari nüngdak asütsüa akok ta bilemer.

Honibarnep 10:00 ako tashi nung police-i lenir 9 chiok, ajisüaka Wu Wuqing aser Shen Xiaqing nabo tang tashi mechiok.

Tena dang senchi achiba den külemi anogo 10 tepuokdak ayutsü obendang agütsü.

2018 küm police-i mezüng Early Rain Covenant Church mita aoba mapang nung tamanger 160 pua liasü aser parnok rongnung Pastor Wang Yi densema liasü.

Iba mapang nungjagi tenzüka ketdangsertemi mapang shia iba Arogo mita aoer. Taküm January aser June ita nunga iba Arogo mita ogo.

ANOGO ABEN TSÜNGREM DEN

Alima nangdakjang

Nenok alima metsü (Mt.5:13)

Yisui Pa nütsüngtem dang ashi, nenok alima metsü. Tetezü Tsüngrem chirtem shia Pa nutsüngtem ajak metsü mesük ta ashiba angur. Metsüji koda tongtipang alima shi taküm nung lir, yamaji Pa nütsüngshiaji alitsüla. Raksaa aliba alima, lokti, kija aser kibong yanglutsü asoshi metsüi inyakba ama tanü inyaktsü asen den jembir.

Metsü dak aketba lesson tajung ka asenoki agidi, tangar junga kümdaktsütsü asoshi pai pa samar pa samaba ajanga tangar dak teronem adokdaksür, ajak putepba kümdaktsür, mesen koba asen temang anemba lir ibaji tepseter, chiyongtsü taküm kümzüka ayur, aser meimchir nema tashi agütsür. Anungji Yisui rnaneni Mark. 9:50 nung ashir, nenok dak metsü ketang aser nenok o nenok na putepang ta ashiba yangi sayur, metsü tetezü Yisu.

Tanüa shirnoki Pa agizüker mesamatsü saka teti tatem maka taküm angutsü. Tanü asen lima raksaa aliba yanglutsü asoshi asenoki Yisu Khrista ajanga tasen asoba Khristan taküm kaka küma yanglushidi. Tanabuba nung asenok ajak yimjung yanglur ka asütsü sarasademdi.

Myanmar nung sepaitemi ano pastor ka khasetogo



Rev. Dal Thawn Tuang

September 20, 2026: September 14, 2026 nikongdang 4:00 ako meta Myanmar nung sepaitemi Rev. Dal Thawn Tuang khasetogo.

Tuang ya Chin state kübok Lamzang yimdak aliba Lamzang Baptist Arogo nung assistant pastor teinyakdak liasü, ta Burma Research Institute (BRI)-i metetdaksü.

International Christian Concern (ICC) Tir, Shawn Wright-i, "Ozü staff temi Pastor Tuang'er kibong aser par Arogo atema sarasademtsür. Tawa Pastor William aser adianu Nam Ceu nata tepseta liasü. Onoki anüolen aliba linüktem nung Khristantem dang item kibongtem atema sarasademtsütsü mepishir aser Burmese Arogo longjema alitsü atema sarasademtsütsü mepishir," ta metetdaksü.

Pastor Tuang ya tesüiba küm 22 tashi Lamzang Baptist Arogo nung tenzüka liasü. Pai kinüngtsü den chirnur ana toktsür pilaogo.

September 14 nü pa khasetba sülen anogo ananü lir September 16 nü asüpila sentong agi.

Anasa aliba yimtsüng ka nung tekülem sentong agiba sülen pa Lamzang-i meyipa aoba mapang nung sepaitemi pa dak injang asemben khalokja liasü. Injang jagi pa tekü, teboklang aser tepi nung khashi.

2021 küm Myanmar nung sepaitemi democracy sorkar atsüngdokba sülen tang tashi nung iba linük nung Tenla ki aser Arogo kiojen 340 dak tali raksatsüogo. 2022 küm nungi 2025 küm tashi nung iba linük nung Khristan 149 tepsetogo aser 218 jail nung puokogo.

CBI-i US nung aliba 'The Timothy Initiative' anema ken o benok

September 20, 2026: India nung bushisüngdangba agency tongti CBI-i US nung amenoka aliba Khristan evangelical telok ka anema ken o benokogo.

The Timothy Initiative (TTI) telok jagi India nung FCRA ozüng alema dollar sen million 10 dak tali India dangi yok, ta CBI-i tai tongloktüsü.

Union Home Ministry nungi tashishiba ken o ka anguba nung ajemdaker September 16 nü Central Bureau of Investigation (CBI)-i The Timothy Initiative (TTI) aser iba telok nung ketdangsertem anema FIR benok.

CBI-i, India nung missionary mapatem inyakdaksütsü atema TTI-i Foreign Contribution (Regulation) Act (FCRA), 2010 ozüng alema India dangi senotsü yok, ta metetdaksü.

Iba ken o nung nisung trok tenüng tetshia lir, aser parnok rongnung TTI operations in-charge in India, Jonathan S Rajan, finance head Ajit Verghese Mathai, US nung TTI nung inyaker Micah Mark nung densema lir.

Taküm April 18 nü Bengaluru International Airport

nung Mark pua liasü. Tanüngba nisung asemji field staffs-Varghese Chacko, Supreme Joy aser Bablu Kurmi nung lir.

TTI-i FCRA oüng alema inyakba dang masü saka Information Technology Act anema inyak aser ozüng alema asalentong yanglu, ta parnok nem tai tongloktüsü.

Union Home Ministry-i, yaküm November ita nungi taküm April ita tashi nung TTI-i India tesem balala nung aliba ATMs nung sen million 925.5 (dollar sen million 9.65) agizük. Parnoki US nung aliba Truist Bank-i agütsüba foreign debit cards amshi, ta metetdaksü.

2024 küm January ita nungi 2026 küm March ita tsüngda nunga Karnataka, Assam aser Chhattisgarh state tem nung TTI-i sen million 44 agizüka liasü, ta Home Ministry-i metetdaksü.

Ketdangsertemi Bengaluru International Airport nung Mark apuba mapang nung pa ket nungi foreign debit cards 24 liasü.

CBI-i, item senotsüji India tesem balala nung training agütsütsü, sayutsüngitsü aser

sensakertem Khristan yimsü dangi meyipdaksütsü atema amshi, ta tai tongloktüsü.

TTI anema ken o benokba dak sendakba nung Gujarat nung Jesuit putir, Cedric Prakash-i, "Iba ya TTI anema inyakba lir. September 18 nü FCRA Bill atema mezügbuba Joint Parliamentary Committee senden amentsü lia iba ya TTI anema inyakba lir," ta metetdaksü.

FCRA amendment bill asadanga report renemtsü atema züngsem 31-i akümba Parliamentary Committee ka nem agütsüogo. Taruba asükwa mongpu Parliament senden nung committee-i iba report ji agütsütsü.

New Delhi nung Khristan lenir, John Dayal-ia, JPC mezügbuba senden amentsü lia iba ozüng (FCRA) ya hadir ka ama amshitsü atema sorkari asalentong yanglua inyaker, ta ashi.

United Christian Forum Tir, Michael Williams-ia, "TTI nem tai tonglokja aliba atema tang tashi nungbo kuli kecha mali. Court nung kuli agütsütsüla," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Hashihapong

(adj) tesashi (furious)

* Hashihapong nisung den külemi alitsü kanga tasak.

Henbuhanya

(n) kanga sapuba (relish)

* Lanurtemi amsu kanga henbuhanyaa achir.

OLONG PAITEP # 7656

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPLIN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7655 TELANGZÜBA**TIPLIN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiooktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER

China nungi arishi küm 9 tain Ziyu Ye-i mapang tekaratiba nung 2×2×2 cube ka yanglutetba otsü yanglua lir. Chinese speedcuber Ye-i China Hefei Open 2025 nung 0.39 seconds nung dang 2×2×2 rotating puzzle cube ka yanglutetba ajanga alima otsü tasen yangluteta lir.

20th Rozgar Mela nung Northeast lanur 127 mapa angu**Shillong, September 20, 2026**

(Agencies): Union Minister of State for External Affairs and Textiles Pabitra Margherita-i September 19, 2026 nü State Convention Centre, Shillong nung appointment letters agütsüogo.

20 buba Rozgar Mela alidang Northeast tesem balala nungi lanur 127 nem appointment letters agütsüogo. Parnok ya Central Government nung department balala kübok

mapatem anguba lir.

Rozgar Mela nung shilem agiba atema pelar aser linük nung lanur 51,000 shi ka nem appointment letters agütsür ta Margherita-i ashi.

Rozgar Mela ya linük kübok tesem 45 nung külemi ayonga agi aser Chief Commissioner of Income Tax, Shillong indang office nung iba sentong agia liasü.

Prime Minister Narendra Modi-i mapa angurtem nem tenüngsang agütsü aser parnok

dang meranga inyaktsü aser linük renlokba nung shilem agütsü ayongzük.

Rozgar Mela maparen ajanga linük kübok tesem balala nung lanur lakh 12.75 shi ka nem appointment letters agütsüogo ta Margherita-isa ashi.

Iba mapa ya Prime Minister Modi'er mangdang kübok tenzük aser India kübok tesem balala nung lanurtem nem mapa inyaktsü maongkatem agütsüogo ta paisa ashi.

India'er clean nung Arunachal-i yaritettsü: Chowna Mein**Itanagar, September 20, 2026**

(Agencies): Arunachal Pradesh nung hydropower maparen tulu inyakttsü lenmang sadema lir aser iba ajanga India'er clean energy maparen nung tongti shilem agitettsü ta Deputy Chief Minister Chowna Mein-i ashi.

New Delhi nung 'Financing India's Journey Towards a Viksit Bharat' mungdang ka nung jembidang "hydropower provides ajanga renewable energy tajung agütsür aser solar o wind amala intermittent sources melenzüksü" ta Mein-i ashi.

Mein-i power aser hydropower portfolios bona lir aser paisa ashiba agi Arunachal Pradesh nung hydropower resources renloktsüba ya state priority ka ama masü saka strategic national opportunity ka ama züngshitsüla ta ashi.

"Arunachal Pradesh nung 58,000 MW jungnüa hydropower adoktsü asadangtetogo. Ibaji linük nung total hydropower potential 40% lir. state Sorkari 2047 tashi nung hydropower capacity 40,000 MW tashi agütsü

nükjidong yua lir" ta paisa metetdakttsü.

"Arunachal Pradesh nung hydropower sector nung 2016 küm 405 MW aliba nungi 1,200 MW aser Subansiri Lower Project lapokba sülen 2,270 MW kümogo" ta Mein-isa ashi.

'Decade of Hydropower 2025-35' vision kübok Arunachal Pradesh-i additional hydropower capacity 19,000 MW tashi tenzüksü sentong lir.

Hydropower sector ajanga mapa 30,000 (direct) aser 16,000 (indirect) adoktsü ta Dy CM Mein-isa ashi.

NCC Northeast ADG-i Tripura CM den ajurutep**Agartala, September 20, 2026**

(Agencies): NCC Directorate, North Eastern Region nung Additional Director General Major General Anurag Vij-i Tripura Chief Minister Prof Dr Manik Saha den ajurutepogo.

Tripura nung National Cadet Corps activities tashi itshitsü aser ulushitsü atema iba senden amen.

Senden nungsa Brigadier Anand Raj Singh, Group

Commander, Silchar aser Colonel NS Baath, Commanding Officer of the 13 Tripura Battalion NCC na aden.

Tripura nung lanurtemi NCC nung adentsü atema senden nung tebilembatem lemsatet ta NCC Directorate, North Eastern Region ajanga ashi.

Senden nung NCC ulushitsü, shisaliok rejutem aser cadets-i shilem tuluba agütsü,

infrastructure akangshitsü aser NCC training o youth-development programmes agütsü indang jembitep.

Agartala nung national-level integration camps ayonga amungtsü indang parnoki jembitep. Ibala camps ajanga linük tesem balala nungi cadets ajurutepa sensaksemer aser national integration o cultural exchange ajungketer.



Manipur nung Assam Rifles-i corporate social responsibility mapa kübok tetsür 29 tashi Marriott International nung mapa ngudaktsüogo aser iba atema tenüngsang agütsüba sentong ka agiogo. Taküm August ita tatemlen Khuga Battalion Headquarters nung online interviews ajanga candidate tem shimteta liasü. Iba mapa ya Assam Rifles-i Project PRANITA kübok inyak aser 27 Sector Assam Rifles nung Brigadier S. Prashant-i anir ketdangsürtemi sentong nung aden. Iba sentong nungsa civil society züngsemtem aser hospitality company ketdangsürtem aden.

Saudi Arabia ymtiba nung Houthi missile khaloktsü

Riyadh, Rongjui/Sept. 20 (Agencies): Yemen indang Houthis den rara aliba Saudi-i aniba coalition forces-i ashiba agi, Iran-i yariba telok yagi anepbongi Riyadh dak ballistic missile ka khaloktsüba anünglak nung lia raksatsü.

"Houthis-i Bisha, Taif, Farasan aser Yanbu nung civilian aser civilian ki o jen nunga amaktsü merang saka Gulf nung chuba yimli indang air defences ajanga nokdangtet," ta coalition forces indang odongtar Major-General Turki al-Maliki-i Honibarnü X nung zülua liasü.

Saudi Arabia-i Hokulbar aonung par yimli nung tsükchir temi anünglen nungi timtem agütsütsü ta tekum dangtsü shia emergency alerts sangdonga liasü.

Honibarnü Riyadh nung ola tulu adoka apokba angashiogo aser airport anasa alirtemi ashiba agi, parnoki anepdang mokozü tanak aser tulu adoka aliba angu. Saudi ketdangsür temi asü-amaba mesüra ki o jen meraksatsü ta ashi.

July ita Yemen nung Houthis den rara tenzükba tali tesashiba kumer Riyadh nung air raid alert ola agütsüba iba ya mezüngbuba alitsü.

Houthis-i linük yimtiba nung civilian aser civilian ki o jen nung amaktsü merangba tali akumer ta Saudi odongtari ashi. International humanitarian law

nung aliba ama Houthis teloki amakba nokdangtsü asoshi coalition command temenden lir, ta pai ashi.

Houthi mitkar indang odongtar Yahya Saree-i sangdong ka lemsatepba nung, Honibarnep Uemen nung aliba Houthi fighter temi Riyadh nung tongtipang tesemtem aser anüolen tzükum nung aliba Yanbu yimti nung Aramco oil facility nung amak, ta shia liasü.

Houthis-i Saudi Arabia dak cruise aser ballistic missiles aser drones amshia amak, ta Saree-i ashi.

Kasa mapang Yemen nung alima ajungai agizüka aliba aser Saudi-i yariba sorkar indang armed forces temi Honibarnü southern Marib kübok al-Fuliah sector nung Houthi telok aittsü merangba aridok aser iba mapang Houthi nung 12 tepset aser aika yirutsü ta ashir.

Army temisa southwest tsütsü Taiz aser Lahj province tem nung Houthi sepaitem den anogo ana raraba mapang Yemen sepai 13 asü ta ashi.

Yemen kübok Marib, Taiz, Lahj, al-Jawf aser al-Bayda tesemtem nunga asendenshir raraba osang lir.

Houthi teloki Saudi Arabia yimtiba amaktsü merangba asoshi Jordan, United Nations aser Gulf Cooperation Council (GCC) temi aitsüogo.

North Korea-i ballistic missile ana tendang

Seoul, Rongjui/September 20 (Agencies): North Korea Deobarnü linük antok tzüküm nungi missile ana tendangogo, koba hopta ka tsüngda anabenbuba tendangba asütsü. Military drill balala ayongzüka Korean Peninsula nung tensa mejungi kümdaktsüba atema Pyongyang-i US aitsüba sülen anogo ishika lir item missile tem tendangogo.

Deobarnü short-range ballistic missile (SRBM) ka tendangba sülen ghonda asem lir North Korea-i ano short-range ballistic missile tanga ka tendanga liasü, ta South Korea defence ministry-i ashi.

South Korea indang Joint Chiefs of Staff-i ashiba agi, mezüngbuba ballistic missile ya Wonsan nungi nikongtsütsü 3 ako meta khaketa yoka liasü. Japan defence ministry-ia, missile ya ballistic missile asütsü ta bilemer ta ashi.

Japanese public broadcaster NHK-i, missile ya Japan indang exclusive economic zone tema nung tsüka liasü, ta ashi.

Mezüngbuba missile ya 450

km (280 miles) shi yima ao aser Hwasong-11 series nungi asütsü ta bilemer, ta South Korea indang military-i ashi.Tanabuba short-range missile koba Wonsan nungi 5:50 ako shi nung khaketa yoka liasü, iba ya 600 km (373 miles) dak tema yima ao, ta military-isa metetdaksü.

South Korea indang National Security Council-i short-range missile tendangba ya aitsüogo, koba September 12 nü tendangba sülen tanabenbuba tendangba liasü. Council-i Pyongyang dang missile tendangba tangsa tang anentsü mepeshia metetdaksüogo aser ashiba agi, missile tem tendangba ya UN Security Council bangzüng anema lir.

UN nuclear watchdog-i Pyongyang indang nuclear programme anema bangzüng yangluba North Korea-i Honibarnü magizüki liasü.

Pyongyang-isa, taoba hopta US-i anir South Korea aser Japan nungeri Guam anasa naval drill ayongzüka agiba aitsüogo.

Lahore police-i Imran Khan teyi Aleema Khan apu



Lahore, Rongjui/Sept. 20 (Agencies): Jamaat Khana tezülen Lahore Police-i Imran Khan teyi Aleema Khan apu ta Pakistan Tehreek-e-Insaf (PTI) ajanga ashi, aser parnoki la tangsa chioktsü khanga yimtenren tsütsü mera tali agitsü tekum dangtsü ashi.

Aleema Khan apuba PTI-i aitsü aser la apuba ajanga yimtenren tsütsü mangatettep tali akumtsü akok ta ashi. Party yagi yimten inyakyim manentsü aser Islamabad tsütsüi tetsüng agi jaja aotsü sentong aliba ya yimjung nung aser yimtenren tsütsü nungi alitsü ta nenshia ashi.

PTI Chairman Barrister Gohar Ali Khan-i social media X nung, Maintenance of Public Order (MPO) law kübok sorkari Aleema Khan

apuba atema tekum dangtsü shia iba ama mera agiba yagi mangatettep tali tamajungba akumtsü ta ashi.

Islamabad leni aotsüba ya yimjung nung aser political aser constitutional yimya ajanga alitsü ta ashi.

Longkak aitba, party inyakyim nung tenokdangba agütsüba aser Adiala Jail nung Imra Khan den majurudaktsüba mechi PTI aser sorkar tsüngta maneni mangatettep adoka aliba mapang iba ya ataloker.

Kasa mapang Shifa International aser PIMS nungi doctor tem aliba special team ka taoba Pakistan ato kilonser aser cricket asayar tejen Imran Khan temang reprangtsü asoshi Deobarnü Adiala Jail tonga aruogo.

Khan ya Adiala Jail nung tenük aser cardiac reprangtsü akok, ta iba tepuokdak nungi osang tem ajanga ashir.

Khan ya Rawalpindi nung aliba Adiala Jail nung puoka lir, kong pa temang mejungi akumer, mapang talangka azüngmeyaka shinga nem majurudaktsür aser medical care nokdangba ajanga alima tesem balala nungi tebilemtsü akar.

Specialist doctor temi Khan indang temang tendangogo aser pa mozü kidangi anir aotsü asoshi medical report dak keta lir, ta osangtem ajanga ashi.

Timtem tulubaji Khan tenük achichilen ya lir. Pa indang legal team aser kinunger temi Khan ya Central Retinal Vein Occlusion (CRVO) agi timtemer aser tepuokdak ketdangsür temi senzüka yutsüba mechi pa tenük achichileni junga manguba shilem 85 shi jungogo ta ashir, koba sorkari magizüker.

Tawa tepuokdak nungi medical report tem ajanga ashiba agi, Khan ya temulungjang nung anisüngzük maka, tekolok anibelem, temungjang nung azü jajaba tekeraba kuma high blood pressure lendongbang nung lir.

DR Congo health worker nem Ebola vaccine agütsü tenzükogo



Kinshasa, Rongjui/September 20 (Agencies): Democratic Republic of the Congo (DRC) kübok tesem kar nung health worker tem nem Ebola vaccine agütsü tenzükogo aser iba ajanga tashidak nungi nüburtem jenboa toktsütsü ta aikati bilemer.

Vaccine ya Honibarnü nungi tenzüka Ituri province yimtiba Bunia nung agütsü tenzükogo. Ituri ya Ebola tashidak poktetdak teyongtsü lir.

Provincial governor, Major-General Gaby Kasongo Mulumba-i ashiba agi, talisa iba tesem nung health worker tem lendong nung lir aser tashidak anepalutsü atema parnoki

tongtibang shilem agidar.

World Health Organization aser Doctors Without Borders nati achaayanga vaccine ya agütsüdar aser North Kivu nunga agütsütsü sentong lir, kong tashidak kanga kara menatepa odor, ta health ketdangsürtemi ashi.

Health aser tanga frontline worker 50,000 shi nem Ervebo vaccine ya agütsütsü, koba iba tashidak Zaire strain atema yangluba lir.

Bundibugyo virus agi adokdaktsüba tang pokteta aliba Ebola strain ya iba vaccine yagi akoktsü makoktsü aji vaccine agir 20,000 küm ka tashi asadangba sülenang

jangjatsü.

Tang pokteta aliba strain atema licensed vaccine ka yanglutsü asoshi clinical trials tagidak lir. Iba strain atema vaccine mali mesüra iba treatment yagi taneptsü angur ta asüba kuli kecha mali.

WHO experts temi ashiba agi, shiruru dak tendangba sülen Ervebo vaccine yagi tang pokteter aliba tashidak ya terabo nokdangtetsü akok.

Iba tashidak yagi May ita nungi tang tashi nung nisung 3,639 tepsetogo aser nisung 7,541 shi menaogo. Nisung 1,823 taneptsü nguogo, ta local ketdangsürtemi metetdaksü.

WHO-i August ita ashiba agi, DRC nung amshitsü atema Ervebo dose 70,000 asoshi temaleba agütsüogo.

Iba vaccine ya compassionate-use programme ka kübok amshidar, koba ajanga medical product ka tashidak ka asoshi amshitsü atema mejeta agizüker meliaka tashidak kanga mejungi prokshia aoba mapang amshitsü melar.

WHO ketdangsürtemi ashiba agi, tashidak menatepa aoba tajemba küma odor asütsü akok, ajisüaka MSF-i Hokolbarnü tashidak azüokba kuli kecha mali ta tekümdangtsü metetdaksüogo.

Asian Games: Valarivan-i tetsür 10m Air Rifle asaya nung silver angu

Rongjui/September 20, 2026 (Agencies): 2019 World Cup gold medallist Elavenil Valarivan-i Deobarnü tetsür 10m air rifle event kija asaya nung silver medal nguogo. Kasa anogo lai team event nunga silver medal ka ngur liasü.

Elavenil ya India tsürtem rongnung takok tajungtiba anguba rifle shooter ka lir aser lai team event nung silver medal angutsü atema teyari agütsü aser iba sülen kija asaya nunga silver medal ngua liasü.

Final nung Tamil Nadu nung asoba asayar yagi gold angutsü imla liasü, saka asaya tatemlen junga masayatetba sülen Japan tsür Hinata Taichi-i gold medal angu.

2025 World Championship bronze medallist yagi point 252.4 angu, koba Taichi dang nungi 0.6 agi dang ishiba liasü, shibai point 253 ngua Asian Games record ka yangluogo.

South Korea tsür reigning world champion aser Paris Olympics gold medallist Ban Hyo-jin-i point 230.4 ngua bronze medal angu.

Elavenil atema iba ya Asian Games nung mezüngbuba medal liasü. La 2018 Jakarta aser 2022 Hangzhou nunga asayaogo, saka takok mongutet.

Final asaya ya mapang talangba ka Elavenil-i amokbanger asaya aser lai gold angutsü imla liasü. Shot 17buba sülen la 1.4 agi Ban dang nungi timba liasü aser Taichi tasembuba jenjang nung liasü.

Shot 21buba sülena Elavenil ya Japan tsür la dang nungi point



0.2 agi timba liasü. Ajisüaka tatembangbuba shot ana anunga lia Elavenil 0.3 agi Taichi sülen aküm. Lai 10.4 ka akha saka Japan tsür la yagia 10.6 khateta 0.5 agi tejakdang aküm.

Tatembangbuba shot nung Elavenil-i 10.1, saka Taichi-i 10.2 khateta gold angu aser Asian Games record tasen ka yanglu.

(India tetsür badminton team quarter nung Japan den asayatsü)

Aichi-Nagoya Asian Games nung India tetsür badminton team-i asaya kanga junga

tenzüka Deobarnü Kazakhstan 3-0 agi kokogo aser parnok quarterfinal nung Japan den asayatsü jangjaogo. Ichinomiya City Municipal Gymnasium nung PV Sindhu, Unnati Hooda aser Tanvi Sharma nunger ajaki takok ngua liasü.

World No. 11 Sindhu mezüng asaya aser lai 21-7, 21-9 agi Kamila Smagulova akok. Kazakhstan tsür la ya BWF world rankings nung 426buba nung lir.

Tanabuba kija asaya nung world No. 24 Unnati-i world No. 866 Alissa Kuleshova 21-7, 21-10 agi ayong ayonga koka liasü.

Iba sülen Unnati shiba world

No. 26 lir, lai world No. 1067 asayar Diana Namenova 21-5, 21-10 agi akok.

Ajisüaka India team asoshi quarter final asaya ya melarabo masütsü, kechiyong parnok Japan den asayatsü lir.

Japan team nung kija asayar asem world rankings nung top 10 nung lir. Akane Yamaguchi No. 3, Tomoka Miyazaki No. 7 aser Nozomi Okuhara No. 10 lir.

Iba asaya nung Sindhu aser Yamaguchi na asayatsü imlar. Unnati aser Miyazaki na asayatsü aser tetsür tarep asaya nung Treesa Jolly aser Gayatri Gopichand na Japan tsür world No 3 tarep Yuki Fukushima aser Mayu Matsumoto na den

asayatsü imlar.

India-i Japan koka semifinal tongtetra parnok South Korea den asayatsü. Korea team nung world No. 1 An Se-young aser world champion tetsür tarep Baek Ha Na aser Lee So Hee na lir.

(India tetsür cricket team final-i iogo)

Defending champions India tetsür team-i Nisshin, Japan kübok Korogi Sports Park nung semifinal asaya nung bangladesh team run 114 agi akokba sülen final-i iogo.

Over 20 nung asayar 4 out ser run 195 yangluba sülen India team nungi bowler temi Bangladesh team nem Over 15.4 nung asayar ajak out sütsür run 81 dang yangludakja liasü. India team September 22 nü Sri Lanka den final asayatsü aser medal kabosa angutsü jangjaogo.

Mezüng batting amentsü shimba sülen Smriti Mandhana aser Shafali Verma nati asaya kanga junga tenzüka aser powerplay nung run 71 yanglu. Mandhana-i ball 18 nung run 37 yangluba sülen la out süatok.

Iba sülen Shafali-i asaya azüoka asaya aser ball 49 nung run 100 yanglua liasü. Lai six trok aser four pezü azük. La ya Asian Games nung tetsür cricket asaya nung century ka yangluba mezüngbuba asayar kümogo. Asaya nung Harmanpreet-ia ball 33 nung run 40 yanglua liasü.

Tanabuba innings nung bowling aonba mapang Nandani Sharma aser Deepti Sharma nati wicket asemsem agi aser Shree Charani-ia run 7 agütsür wicket ana agia liasü.

T20I rankings nung England temaba jenjangi tuogo

Rongjui/September 20, 2026 (Agencies): Old Trafford, Manchester nung Honibarnü tasembuba T20I asaya nung Sri Lanka wicket ti agi koka asayamung 3-0 agi akokba sülen England-i India ajateta T20 world rankings nung temaba jenjangi tuogo.

Honibarnü asaya nung England-i ball 62 anunga lia Sri Lanka-i target 126 toktsüba menepa liasü. Iba asaya akokba densema England-i T20 nung asaya 15buba atonga Sri Lanka madak takok nguogo.

Mezüng batting amenba sülen Sri Lanka-i asayar ajak out ser run 124 dang yanglua liasü.

Parnok rongnungi Pathum Nissanka-i run (36) timba yanglu aser Kamindu Mendis-ia ball 28 nung run 35 yanglua liasü. Will Jacks, Jofra Archer aser Player of the Match Sonny Baker nungeri wicket anana agi.

Tanabuba innings nung opener Aneurin Donald run 13 dang yanglur out süatok, saka Jos Buttler aser Harry Brook

nati asaya azüoka liasü.

Buttler-i ball 32 nung run 62 yanglu aser Brook-ia run 33 yanglua liasü. England-i over 9.4 nung asayar 2 out ser run 126 yanglua asaya akok.

Buttler ya Brehostibarnü T20 asaya nung run 15,000 yangluba mezüngbuba asayar aküm.

Asayamung nung Brook-i run timtiba yanglu aser pa nem Player of the Series naroküm agüja liasü.

Asaya nung Sri Lanka nunger bower temia ball junga montet aser wide teku tashi aon aser anabo

boundary-i oa liasü.

Asayamung nung mezüngbuba asaya Southampton nung asaya koba England-i run 119 agi akok. Iba asaya nung Brook-i out mesüi run 114 yanglu.

England aser Sri Lanka na Mongolbarnü nungi ODI asaya asem asaya tenzüksü. Mezüngbuba asaya Durham kübok Chester-le-Street nung asayatsü.

India tour atema West Indies squad sangdongogo

Rongjui/September 20, 2026 (Agencies): India den ODI asayamung atema West Indies-i asayar tejen John Campbell team nung züngoksemogo, aser Kamil Pooran tang mezüngbuba T20I nung asayatsü lir.

Caribbean team ya India den September 27 nungi October 17 nü tashi nung ODI asem aser T20I pongu asayatsü. Asayamung ya yimti ti nung asayatsü.

Campbell hamstring yiruba ajanga New Zealand den taoba ODI ana masayateti liasü. Captain Shai Hope lenisüba nung team asayatsü, kong lanur batter Jewel Andrew-a densema lir, shibai Ackeem Auguste melenogo. Auguste ya August ita surgery agir lir.

Shimron Hetmyer, shiba New Zealand den ODI asaya liasü pa ODI squad nung mali, saka T20I asayamung nungbo shilem agütsü.

India den mezüngbuba ODI ana asayaba sülen 2027 ICC Men's ODI World Cup atema automatic qualification phase tembangtsü. West Indies pur taruba küm tetenzüklen qualification asayamung ka asayatsüsa akümstsü, kechiyong parnok automatic qualify mesütet.

West Indies ODI squad: Shai Hope (captain), Jewel Andrew, John Campbell, Keacy Carty, Roston Chase, Matthew Forde, Justin Greaves, Amir Jangoo, Alzarri Joseph, Shamar Joseph, Vitel Lawes, Gudakesh Motie, Keemo Paul, Sherfane Rutherford, Jayden Seales.

T20I squad nung temelenshi tulutibaji Kamil züngoksemba

ya asütsü, shiba tawa kanga junga asayaba sülen shimogo. Pai asaya ti nung run 273 yanglur lir.

Quentin Sampson, shiba taküm West Indies indang T20 World Cup squad nung densema liasü, pa-a shimogo. Kasa mapang nung all-rounder Jason Holder

anisingzükdaktsüogo. West Indies T20I squad: Shai Hope (captain), Jewel Andrew, Roston Chase, Matthew Forde, Shimron Hetmyer, Akeal Hosein, Shamar Joseph, Gudakesh Motie, Keemo Paul, Kamil Pooran, Rovman Powell, Sherfane Rutherford, Quentin Sampson, Romario Shepherd, Shamar Springer.

BILEMDANGANG

"Tenüngsang agütsüba agi sünga aliba taküm ka pela alir."